

四庫全書

集部

欽定四庫全書

魯齋遺書卷十

元 許衡 撰

編年歌括

總數

始自堯戊辰終於金癸巳三千六百年內減三十四

唐虞

唐堯一百載虞舜五十年禪讓官天下有子不相傳

夏

以夏繼有虞一十有七世得年通幾何四百三十二

商

有商子姓三十世干日為名無癸字六百二十有九年
天下歸周契不祀

周

姬周三十有七王歷年八百六十七西都三百五十二
武成康昭穆共懿孝夷之下厲宣幽十有二朝居鎬邑
東都二十五相傳五百一十五元日平桓莊釐惠與襄

項匡定簡靈景繼悼敬元貞并定哀思考威烈安夷烈
顯與慎靚及赧王厥後秦人併王室

秦

秦人滅周自昭襄孝文後曰莊襄王三傳九載嬴秦亡
呂政繼主號始皇胡亥子嬰俱不昌三世都經四十霜

西漢

西漢十有二帝二百一十四齡高惠傳家未久呂氏僭
起開庭文景武昭而下宣元成哀平嬰

新室

王莽號新室竊據十四年誅夷漸臺後二載屬劉元

東漢

東漢十有二朝一百九十六算光明章和殤安順冲質

桓靈獻

蜀

劉蜀炎漢裔二主據成都四十三年後山川入魏區

魏

曹魏合五主文明齊高章禍稔蕭牆內四十五年亡

吳

孫吳凡四傳權亮休與皓五十九年春青蓋洛陽道

西晉

西晉武惠懷愍四葉五十二年司馬乾綱解紐五胡割

據中原

東晉

東晉渡江十一帝元明成康穆哀廢簡文孝武安與恭

一百三十消正氣

宋

劉宋五十有九年高祖營文孝武廢明并後廢順承之
是為南朝凡八帝

齊

蕭齊二十有七年七葉相乘三見廢祖武鬱林并海陵
明與東昏共和帝

梁

蕭梁傳四主五十五番春武簡文元敬乾坤遂入陳

陳

陳氏合五朝三十二改歲高文廢興宣後主傾神器

後魏

後魏一十一帝一百四十九年道武明元太武文成獻
文相連世以拓拔為氏孝文改姓為元宣武孝明而下
孝莊節閔而旃廢帝孝武之後遂分東西魏焉

東西

西魏三主明廢恭二十二年國祚絕東魏孝靜不再傳
一十七霜元氏滅

北齊

高齊五傳年得四七文宣昭成後幼失國

後周

五主宇文周歷年二十五孝閔明武宣靜宋隋為主

隋

隋代通三世文皇煬與恭三十七年後楊氏數云終

唐

李氏建極臨九有紀年三百八十九神堯太高中睿玄
肅代德順承其後憲穆敬文并武宣懿僖昭哀皆繼守
總來二十一稱尊高後一朝為武后

五代

朱梁三主十六祀太祖友珪末帝是後唐四帝十三春
莊明閔末是為真石晉二世十一載高祖之下少帝代
劉漢四年凡再傳高祖隱帝同一源郭周九載傳三世

太祖世宗與恭帝五代五十有三年其間八姓遞推遷
後唐凡三周凡二餘者舉皆同氣嗣

大遼

九傳耶律之遼二百一十九數祖宗世穆景宗聖興及
夫道豫

前宋

前宋九朝都汴邑一百六十有九年祖宗真仁英神哲
傳到徽欽並北遷

祖宗真仁英神哲徽欽失汴高遷浙孝光寧理度及末
三百餘年宋道滅

大金

有金百一十九年復姓完顏凡九葉祖宗熙海世章東
下逮宣哀南渡滅

稽古千文

太極之前此道獨立道生太極函三為一一氣既分天
地定位萬物之靈惟人為貴太古結繩民醇而愚茹毛

飲血穴處巢居伏羲畫卦始造書契神農黃帝三皇繼
治五帝少昊高陽高辛堯舜揖讓傳中以心歷數在禹
夏承虞禪謳歌婦子啓與扈戰太康遊畋羿距于河仲
康失權胤征羲和一成一旅少康中興桀虐百姓天道
禍淫應天順人殷湯革命咸有一德伊尹元聖太甲放
桐盤庚遷都武丁中興受終獨夫文王事殷明夷蒙難
武發開周首訪洪範成康持守周召夾輔穆王訓刑宣
王復古幽惑褒姒犬戎所弑平王東轍國風遂降虛器

尊周五伯馳騁孔聖春秋爰始魯隱七國爭雄蘇張縱
橫孟軻仁義卒老於行孝公彊秦鞅變井田赧朝昭襄
周祚以遷併吞六國始皇詐狙罷侯置守焚書坑儒阿
房長城賦役虐民二世子嬰陳吳亡秦項起西楚劉興
沛中項弑義帝劉從董公轉戰五年資謀三傑灌嬰垓
下始定漢業高帝忘功誅醢械繫嬖幸戚姬欲立如意
良招四皓幼惠遂定呂雉鳴晨房闔出政陸賈計行平
勃交驩祿產就誅劉氏乃安文帝恭儉詔半為農景帝

遵業醇厚民風武承富庶始建年號窮兵雪耻末年減
耗立昭繼武功歸霍光孝宣中興道雜霸王元成哀平
權移女黨張禹佞諛黨比王莽十有四年亂生新室更
始劉盆王尋王邑光武中興羣盜乃滅寇鄧元勲耿賈
洪烈天下平定進尚文吏退全功臣封縣數四禮優嚴
陵占動太史二百年間名節奮起明帝苛察章帝寬厚
和誅竇憲殤終襁幼安雖享御權歸外戚北鄉弗永順
淪嬖習冲幼質聰弒於跋扈桓誅梁冀陳李黨錮靈委

宦孽黃巾嘯聚進召董卓獻終漢緒曹丕稱魏劉備興
蜀孫權號吳三國鼎足混於西晉都於洛陽武惠懷愍
劉聰所亡元帝南渡一馬化龍建康再振為晉之東明
成康穆哀廢簡帝武安偽楚恭遜劉裕原晉之弊起於
浮誇清談之極永嘉以後宋齊梁陳元魏東西南北瓜
分後周併齊隋文混一始盛開皇煬帝窮奢恭帝禪唐
唐高之興太宗之謀閭門慚德責以春秋田以租調兵
以府衛七百餘員首定官制貞觀仁義髣髴三代本根

不正隨亦闕壞再傳高宗已罹女禍李勣一言唐業幾
墮武后稱制欲立三思倘非仁傑孰引東之中宗復辟
嗣興韋后睿遜玄宗以功授受開元太平天寶昏亂貴
妃內惑祿山外叛肅宗即位大分安在中興有頌功不
贖罪代宗中材德宗猜忌奉天所倚陸贄仁義順在東
宮陰賜天下憲任裴度平淮有雅惜其晚年禍生不測
穆敬昏庸不能討賊文宗銳意太和清明僅誅弘志莫
正典刑輕用訓註禍成甘露武用德裕遂平澤潞宣宗

寡恩唐治以衰懿僖昭哀遂不可支唐患非一朋黨閹
寺藩鎮強大宣武篡弑朱梁李唐至於石晉劉漢郭周
是為五閏錢馬高揚承襲割據李王孟劉各復僭偽兵
變陳橋宋祖即位尅平中夏以國傳弟九葉中衰江左
六裔遼金據華亦各九世天眷地顧篤興我元四海會
同本枝萬年稽古提綱維此千言

設器歌

奉禮郎各齋戒丑前五刻執事帥共設俎豆神位前史

祝祝史亦同在籍以席加巾蓋自北而南分内外左十
籩右十豆二四四三居俎後東西相向南北行一四二
三分左右魚鹽棗蓼實籩中菁葵笋芹對于次豆兔魚
並韭薤次籩桃榛及鹿脯栗芡蔘盛最外籩醢醢鶩豚
饌西布羊俎東豕俎西熟載三端十一體正直橫長代
短雙脇脊中肫胙底上端更有肩背臠此是十一年如
豕豕前更有祝版案羊前爵坵東幣篚籩豆兩間何所
增毛血一豆南三登東西排實大羹登南更有三鉶鼎

和羹加枲東西等少南南北簋簋行簋二偏東實稻粱
簋二偏西置黍稷東西正與兩俎直簋簋之間或有爐
兩燭俎前安可無左右配位同前設更排籩豆在十哲
籩鹿栗豆鷄菁俎左籩南肉二斤籩豆之間容簋簋簋
簋之間實黍米更加坩燭于俎南然後中間設酒醴北
向西上加幕勺犧象齊盎及明水清玄設置二山壘六
尊有坩俱相尾配位樽罍酒醴同設位之時稍近東

魯齋遺書卷十

欽定四庫全書

魯齋遺書卷十一

元 許衡 撰

四言律詩

夢中

花謝花開時去時來福纔慰眼禍已成胎得未足慕失
未可哀得失在天敬聽天哉

五言古風

觀物 四首

裸袒遊市門逢人遽侵侮俄而被捶撻號痛淚如雨若
輩懵不靈妄動招危傾云何大夫士亦甘此由行行路
細如縷間關何權數久久成拙謀一往竟不悟我始窺
其端居寬尚盤桓盤桓非懦怯後事當無難

物產天地間精粗據兩偏兩偏互倚伏一氣常周旋善
善不可緩安安貴能遷人生喻此意自當心乾乾
萬物備吾身身貧道未貧觀時見物理主敬得天真心
爽星辰夜情欣草木春自憐喪亂後能作太平人

事物形雖同中間勢各異推遷無寧期倏忽幾易位智者識機微安馬處平易人生貴無私莫使聞見累

遊黃華

我生愛林泉俗事常鞅掌十年若煩劇一念愈傾仰峯巒看畫圖雲煙入想像久成心上癖欲忍不可強荷有敬齋公恒以善相長攜我遊黃華一洗塵慮爽行行嘆奇絕舉目皆勝賞鏡臺聳百嶮瀑布落千丈石苔積重痕溪風動幽響使我躁競息使我心志廣恍如夢中身

翱翔千古上回首聲利場誰能脫塵網我老得仁心動
作皆可像還家擬鄰居求田冀接壤便許樸鈍質於此
靜中養

訓子

干戈恣爛熳無人救時屯中原竟失鹿滄海變飛塵我
自揣何能能存亂後身遺芳藉遠祖陰理出先人俯仰
意油然而此樂難擬倫家無儋石儲心有天地春況對汝
二子豈復知吾貧大兒願如古人淳小兒願如古人真

平生乃親多苦辛願汝苦辛過乃親身居畎畝思致君
身在朝廷思濟民但期磊落忠信存莫圖苟且功名新
斯言殆可書諸紳

有感 二首

嬌兒未成人病苦不肯退憂傷動中懷惻惻心欲碎老
妻情更惡中夜泣相對何如早還歸山陽墳隴在平生
所願心展轉不得遂十年誤同遊回首只多愧病連肝
肺深因覺妻子累悠悠故鄉情滴滴眼中淚孤死知首

邱人生戀鄉土我心久焦勞宿疾安能愈所望還故鄉
微骸近先祖骸髣足嘆嗟西風動寰宇

歸興不可遏歸程待何時悠悠故鄉心一夕千里馳西
風動霄漢惓惓令人悲況我多病身天涯久棲遲交遊
義難忘豈忍輕別離重念邱隴遠嬌兒正愚痴因循死
異邑後世將何遺所願經營日及此未全衰桑樹塙以
下開畦水之湄既得舒困難且可為鎡基幼無孝悌稱
老無恩澤施唯有近先塋一死乃其宜諸君苦留連雅

意金蘭期我自無遐福形骸變焦痿生平尚求友得友
還差池中懷起愁嘆欲別難為辭試問將居廬何日當
西之緩急有擬議行止更無疑作詩敘懇款為報吾人
知

送竇清叔

初來識君面此行見君心匡時有長策慮遠憂且深俗
親取近效雅意入幽沉人生貴所依所依貴知音知音
得長布身將比黃金我本貧賤士多思委相尋未得辦

一飯胡為遽分襟征鴻出遠塞西風動疎林去去渺萬里何年酒同斟含情望無極白雲障孤岑

讀東門行

貴德德乃顯尚力力為優二者各有時天運非人謀舉世皆好義貧賤固可羞天下方事強聲譽將何求人生會此意出處皆無憂但恐利欲驅由非所當由足躡虎狼尾手撩虺蛇頭一觸禍患機相尋遽難休新聞李侯子快意復父讐雄名與英概一日傾九州美事固可羨

猶當究源流掘地得深澤積土為高邱造端起不平是
果誰之尤君子貴謀始責躬重以周弱德較強力明知
勢難侔馳馬走峻坂中間豈容收顛越既莫救豈得乘
桴浮君不見羣雀滿樹急喧啾隋侯有珠不肯投一鳥
死時一珠碎得輕失重非良籌友之直諒仁可輔藥之
瞑眩疾易瘳不知當日誰與乃父為交游

送姚敬齋

凜凜姚敬齋風節天下奇終焉托君侯君侯賢可知人

生貴得友得友真朋龜責善善無遺輔仁仁克推仁善
既皆有受福將自期我來歌吉祥真情寄荒詩一祈仁
政蘇民疲一祈善政賙民饑豐功偉績鐫長碑千年萬
年感激人心無了時

梁侯壽

律管歲寒深梅花春意早君侯應嘉祥俊逸固傾倒直
氣與衆殊孤標能自保藹然仁者心慕悅古之道視民
猶視己重賢如至寶兒孫冀傳習詩書人倫討忠鯁擬

力輔姦巧期痛掃含積有休徵天錫永難老

別西山

大山如蹲龍小山如踞虎烟嵐鬱蒼翠遠近互吞吐我
來蘇門居遨遊成樂土策杖望朝雲捲簾看暮雨佳意
豁塵腥勝概入談麈使我鬱陶消使我勞瘵愈生平鄙
吝心一洗出千古回首聲名人何殊坐圉圉遠役非素
懷況有跋涉苦吟鞭裊春風遲遲如去魯芳菲二三月
追遊盛梅塢歸來願無違一觴相對舉

我愛林慮山不處要路津茲焉幾千古絕彼朝市塵我
來成素交澹澹日益親形骸兩相忘誰主復誰賓充然
樂我饑怡然棲我神朝光連暮色佳意含餘春心境一
融會世味殊未真奕奕草木光熙熙禽鳥馴衆物欣有
托吾廬行亦新詩書詠而歸況有耆德鄰

五言律詩

登東城

步履上東城秋風晚更清亂雲隨日下荒草過堤平野

迥寬凝佇詩成促後生何當常似此慰我病中情

遊北觀

扶杖古城荒飄然意可傷道宮烟鎖樹農舍雨傾牆捕
吏翻疑寇平人却笑狂長吁空仰首天際正蒼蒼

北門觀漲

雨水添新漲陂湖沒舊痕人迷堤口路船上樹頭村歲
事知前誤秋耕未可論誰憐徭役外天亦恡深恩

憶賈君玉

賈君清介士吾輩鮮能羣守志王元伯甘貧范史雲銅
臺書廢讀東郡酒方醺何日尋先約青燈共夜分

病卧

一病連三載孤身萃百憂干戈良未已妻子若為謀生
可陪諸弟歸當老故邱難忘終始義忍死更遲留

不寐

秋宵初感慨展轉不成眠老況青燈外羈愁白髮邊嗟
跼嗟往事安穩憶歸年却起開門望霜清月滿天

戲學老杜去蜀

十載他鄉寓千山故國賒如何虛度日不肯去還家往
事知難及餘生度可涯願言心益地無用苦傷嗟

別友人

良朋不易得此去復誰羣別酒無勞勸濃愁已自醺間
闕花外鳥冷淡日邊雲莫唱陽關徹離聲忍更聞

擬贈彥澤

友益愛曹君標孤出世紛壯懷期遠業高誼薄層雲惡

亂求山隱親賢願德薰我生良有幸歲晚得同羣

秋雨思晴

秋稼方成實連宵雨未休肯接十日限都解萬民愁天
相逢奎見雲占遇甲收西南風未起空憶霽光浮

喜秋晴

苦雨傷秋稼朝雲忽放晴碧空雲盡捲滄海日初升久
客天涯興耕夫隴上情雞豚并社酒處處是歡聲

喜晴

霽色開晴望春風破客顏綠紆東去水青起北來山魏
府方期往共城已夢還芳菲梅塢盛要醉竹花間

子仁改冠

聰明羨劉子奮勇入吾門大省仙家誤真知聖道尊一
簪除舊習千古立深根更願加勤苦詩書日討論

秋寒

秋晴快凝眺高步古城隈雲影水邊去鴈行天際來地
偏幽意勝山遠畫屏開

缺

趙氏南莊

曉起北窓涼清談戢羽觴入簾花氣重落地燕泥香夢裏青山小吟邊白日長秋風載書籍相對築茆堂

夜雨

苦雨變秋霖瀟瀟入夜深亂敲驚葉脫清響雜蛩吟往事百年夢故鄉千里心西風助淒切不管客難任

登城西故臺

薰風不解愠涼氣欲生秋往事都成夢離心祇自愁蒼

黃原上草寂寞水邊邱却憶家山好言歸未有由

五言絕句

別友人

永懷不得遂偃卧惜分陰沁北田園計山東故舊心

九日思親

九日人歡遇雙親我獨思倉皇迷路後哀苦哭兒時

中秋

動是經年隔休教此夕孤玉律秋方半銀蟾影倍清

七言古風

桃溪歸隱圖

溪桃種成事天子已把行藏兩途擬如今鞍馬困黃塵
袖着橫披念生理君不見太倉米登天厨金盤對飢如
珍珠雖能頃刻得貴重無復繼世生民區果欲歸歸貴
速雲雨人情若翻覆虛名累不當饑寒枉惹閑愁亂心
曲果欲歸歸恐晚鏡裏蕭蕭鬢絲短桃花零落幾春風
野鶴山猿有誰管歸去來莫徘徊瓦盆便擬傾新醅脫

冠一笑醉溪石人間萬事俱塵埃

吳行甫雨雹韻

二首

山雲突起凌碧虛怪壯奇態成須臾驚風急雨迸飛雹
飄驟散落千萬珠半空光冷掣電火平地聲走轟雷車
神龍奮怒乃若此不識造化將何如默知嘉禾傷淹沒
坐看積潦橫穿窬小民咨嗟復愁嘆謾執俗議尤當途
當途於今貌房杜機略自知天下無有才足使人羨慕
有勢足使人奔趨暇考陰陽論調燮暇紆徵斂矜號呼

今年金繒滿千駮明年好上登封書

青山偃蹇與世疎只將秀色供吾徒知君如我有山癖
深探遠討吾不如金燈峯山詩千首掛鏡臺前一盃酒
人間萬事盡浮雲故人曾為相思否雲邊鸞鳳玉鞭鳴
跋鱉蹒跚疊繭生天末碧雲凝遠思夕陽無語下西城

七言律詩

病中雜言

六首

人人都畏死來催我道人生死是歸但使牆陰無隱隱

不憂心外有危機得生本自神先宅未死誰知鬼已依
此理分明是天命便須相順莫相違

花遞香風入短櫺草抽新綠倚柴荆正憂多病作身累
還喜幽居見物情花為可觀遭天折草因無用得欣榮
世間巧拙俱相伴不許區區智力爭

莫怪新貧壓舊貧貧來尤覺此心真自憐孤力膺邪議
常欲幽居遠市塵千里烟霞山障曉一竿風月野橋春
憑誰寄問鄉間老我去何人願卜鄰

磊落青山萬仞高，虛崖絕險駭猿猱。
從誰得上品龕住，免我從來俗事勞。
曉日烟霞明澗壑，霽天霏靄散林臯。
休言只好寬凝佇，滿地干戈亦可逃。

但願吾兒會讀書，不妨貧苦一錢無。
頭顱有肉元難厚，項頸生筋自合麤。
暗裏乘除皆造化，分中操守是良圖。
年來識盡榮枯理，却笑蘇張見趣迂。

直須眼孔大如輪，照得前途遠更真。
光景百年都是我，華夷千載亦皆人。
癡陰冷墮雲間雪，和氣幽生地底春。

此意若教賢會得也甘顏巷樂吾貧

春來秋去客中情轉首光陰十歲經學苦煉成心下赤
愁多消却鬢邊青眼前世事翻棋局夢裏家山憶畫屏
何日歸同林下友笑談書史有真馨

繼人葵花韻

蜀葵花色耀深濃偏稱修叢映短叢絳臉有情爭向日
錦苞無語細含風舒開九夏天真秀壓倒千年畫史工
但恨主人貧且窶不教相對舞衣紅

中秋不月次實生韻

撥去塵機得暫閑
秋蟾思比去年看
誰知黯黯陰雲合
故作淒淒夜色寒
好友不來傾綠蟻
詩人徒想凭欄杆
世間萬事難前定
付與無心却自安

秋霖初霽

城外平波遠接天
城中流水亦涓涓
兩旬秋雨餘三丈
一日人心抵十年
忽覩濃雲捲空際
便添喜色上眉巔
憂歡旋逐陰晴改
誰自胸中有大全

遊孫氏別墅

聞道阿孫別業新招呼諸子共尋春
紅韜瘦藟花初動黃染輕稍柳未勻
興況便為生意好風光殊比畫圖真
何當對此常無事慰我年來老病身

病中有感

十載天涯客寄身今年憔悴不堪聞
病來與死傳消息老去無家遺子孫
故里歡遊頻入夢春城凝眺獨消魂
如何藉我知音力五畝耕歸沁北村

遊黃華宮

聞道黃華山水好我來一覽氣增豪
鏡臺對聳千峯起瀑水驚噴萬仞高
曉色雲烟生洞府霽天霏靄散林皋
憑誰早遂終焉計日月登臨不憚勞

七月望日思親

枉却千思與萬思音容無復見當時
草窓夜靜燈前教蔬圃春深膝下嬉
將謂百年供色養豈知一日變生離
泰山為礪終磨盡此恨綿綿無絕期

春雪

玉塵如糝滿東風人道天教兆歲豐
麥已埋深郊外綠
花都封却樹頭紅
半年枯槁從今潤
千里芳菲是處空
為問王孫與農叟
憂歡應見兩難同

題武郎中桃溪歸隱圖

五首

武陵曾有避秦人
人世高誇擬慕真
不道當今異前世
枉尋幽隱伴饑民
紅芳未比紅衣好
綠水爭如綠酒醇
營得一官裨聖政
誰能康濟自家身

桃溪將擬武陵溪，只恐桃溪隱未宜。
詩卷久懷天下詠，畫圖今遣俗人窺。
嚴陵晦迹終垂釣，韓伯韜聲猥學醫。
此輩君侯休羨慕，但當匡救主民疲。

桃溪風景寫橫披，渾似秦人避亂時。
萬樹春紅羅錦綺，一灣晴碧捲琉璃。
飲中更聽琴聲雅，靜裏初無俗事羈。
他日君侯歸此隱，肯容閑客日追隨。

門外鞦韆擺翠烟，籬邊雞犬亦閑閑。
更教爛熳花千樹，對着縈紆水一灣。
好景已憑摩詰畫，他年重約長卿還。

尋思此世人心別又愛功名又愛山

果肯歸來學隱淪閑中別有一乾坤可人碧草自春意
入調朱絃醒醉魂花滿春風看錦浪水明涼月話黃昏
此中意趣知多少莫對簪纓取次論

贈竇先生行

二首

西山山下覓幽村水竹鄰居擬卜君豈意天書下白屋
便收行李入青雲功名准自英賢立得失防因去就分
萬里風沙渺南北請歸消息幾時聞

莫厭風沙老不禁
斯民久已渴商霖
願推往古明倫學
用沃吾君濟世心
甫治看將變長治
呻吟亦復化謳吟
千年際會真難得
好要先生着意深

謝梁安撫惠田

晚年幽興入幽居
擬即諸侯置一區
令德久思親慷慨
佳田今許乞膏腴
太行西對千峯玉
淇水東窺萬斛珠
幸着此身於此老
願從樂正五人俱

用行甫韻

蛟鼉不肯脫淵深鳥雀還知宿茂林
笑我羈孤成蹇蹇於今衰老復駸駸
困來未易追前事病久猶當屈壯心
聞道西溪田可得安栖從此有佳音

晚步西溪

拉友西溪往步聯西溪佳景麗秋天
日回林影蒼烟外風轉灘聲白鳥前
迅走雙輪看磨巧連安獨木訝橋偏
老年活計尋幽隱須擬岡頭置一廛

吳行甫韻

金一八二
卷十一
老作民區百歲翁托身終不羨陳宮山田隨分有生業
儉德養廉真古風五畝桑麻舍前後兩行花竹路西東
幽人自愛幽居好未肯埋身利害中

九日思親

年年九日淚沾衣往恨傷心未易支兒望母時兒哭母
母尋兒處母啼兒兵塵擾擾關河迥風色瀟瀟草木衰
回首天涯謾凝涕悲風千里暮雲垂

偶成

屈指年華四十三歸來憔悴百無堪遠懷未得生前遂
俗事多因困後諳百畝桑麻負城邑一軒花竹對烟嵐
紛紛世態終休論老作山家亦分甘

李生器所恃

二首

人生壽夭本難齊補養徒煩一例推醫到明時無百中
病方傳處有千岐醫能宛轉深求病病解間關巧避醫
生死於茲係天命莫將天命責人為

防病須防未病時病臨休恃藥能醫寸瘡潰處全身死

一息差來五臟危禁盜莫如先禁博存毛未必勝存皮
萬般補養終成偽只有操心是要規

答董瑞卿 二首

性鈍難開似石堅可當名與古人連中懷負赧逃無地
老日歸休幸友賢但想諸兒傳世業豈虞千載綴遺編
區區力穡何堪道不是顏家郭外田

鑿廁胼起掌中堅檐隱堆高與項連涉世更誰如我拙
保身從昔慕君賢青山有約期終老白日無功閱舊編

慙負新詩未能謝且容竭力趣耕田

和姚先生韻

去去迷途莫問津來還惟恐不知真因時用舍固有命
與道卷舒宜在人百尺竿頭愁據險一庵床下樂為鄰
孰輕孰重何須論夢想故園桑柘春

呈友人

事愈沉機德愈真歸來豪氣盡崢嶸天占北史

謂岳臺判禎

祥應學閱西山

謂真先生

禮義精吾道真如千里重虛名冷

笑一毫輕十年談社難相就今日先生合主盟

一作尋思談社

無人管只合先生作主盟

六氣不用味

反推之見其當用者

風闕酸醎熱闕辛火家甘味不須存濕甘辛味兼醎味燥用甘醎亦未聞更有寒酸同一理司天司地不區分

七言絕句

偶得

紛紛身事百千般只要教君賭是

闕

枉將機巧自生難

登天王臺

樓閣荆榛幾變更
登臨只見古今情
當年勝迹無人問
依舊春風草又生

謾得

克己功夫未肯加
責人機見益增多
百年擾攘荆榛裏
存得初心有幾何

宿卓水

五首

腹餒衣單坐又溫
可堪開口話犧文
西風更動蕭蕭竹
清徹先生十一分

寒缸挑盡火重生
竹有清聲月有明
一夜客窓眠不穩
却聽山犬吠柴荆

都笑謀生我最迂
我思猶恐不能愚
紛紛走入荆榛裏
誰肯輕身與竝驅

水有清聲竹有風
我來端欲豁塵蒙
明朝杖履西城路
悵望家山翠靄中

山水年來滿意看，只無幽竹伴幽閑。
從君願乞龍孫去，栽向西城空隙間。

大暑登東城

六首

雲間畏日不肯下，天際好風殊未來。
安得益傾三尺雨，暑天一洗絕塵埃。

三丈危城日暮登，暑威殊不霽。
憑陵何時太華高峯上，細嚼松陰六月冰。

眇眇微軀一指如，豈勝炎暑拍寰區。
當年列子容拳學，

夜半因風上碧虛

本期蕭散築幽深
宜慮煩蒸復見侵
五夜懊懷眠不得
幾乎消絕愛山心

瘴厲蟠空久不開
壟苗枯死旱為災
蒼生夢寐思霖雨
誰似當年傳說才

關鑰胸中本要安
親踈眼底更須看
若教處此無深秘
只恐當機有至難

樂府

沁園春

東館路中

自笑平生一事無成險阻備經記丁年去國干戈擾攘
蹤蹟飄零魯道塵埃齊封景物旅況悠悠百恨增斜陽
裏對西風灑淚魂斷青冥家國未得躬耕又十載羈
棲古魏城念拙謀難遂丹心耿耿嘆韶華易失兩鬢星
星五畝桑田一區茅舍快與溪山理舊盟橋邊柳安排
青眼待我歸旌

鷓鴣天

夜寒

土塌侵尋夜半風眼羞無睡強朦朧新詩暗琢拳拳裡
往事都思展轉中 庸起栗脊彎弓須知玉汝是天衷
藩間也去隨人乞怎立當年濟世功

一作怎得心
胸浩氣冲

滿江紅書懷

親友留連都盡道歸程勿逼還可慮干戈搖蕩路途艱
厄萬事豈容忙裏做一安惟自閑中得便相將妻子抱
琴書青山側 行與止吾能識成與敗誰能測但糲飧
餬口小窓容膝桑梓安排投老地詩書准備傳家計使

蘇張重起論縱橫心難易

沁園春

壑田東城

月下簷西日出籬東曉枕睡餘喚老妻忙起晨飧供具
新炊藜糲舊醃鹽蔬飽後安排城邊壑斲要占蒼烟十
畝居閑談裏把從前荒穢一旦驅除為農換却為儒
任人笑謀身拙更迂念老來生業無他長技欲期安穩
敢避崎嶇達士聲名貴家驕蹇此好胷中一點無歡然
處有膝前兒女几上詩書

滿江紅

別大名親舊

河上徘徊未分袂孤懷先怯中年後此般憔悴怎禁離
別淚苦滴成襟畔濕愁多擁就心頭結倚東風搔首謾
無聊總難說黃卷內消白日青鏡裏增華髮念歲寒
交友辟蘿烟月莫道人生歸去好誰知美事難雙得計
從今會合在何時長相憶

魯齋遺書卷十一

欽定四庫全書

集部

魯齋遺書卷十二至十四

詳校官中書臣徐志晉

侍讀臣孫球覆勘

總校官檢討臣何思鈞

校對官中書臣朱圻

謄錄監生臣楊承業

欽定四庫全書

曾齋遺書卷十三

譜傳

魏國公通

通其先河內人避地河南隱德弗耀贈銀青榮祿大夫
大司徒追封魏國公諡和惠暨配李氏追封魏國夫人
子二衡衍

魏國文正公衡

通長子

衡字仲平行一號魯齋金泰和九年己巳丙寅生於新鄭邑中幼有異質稍長嗜學無倦以德化人元世祖受地秦中聞先生名遣使召赴京兆教授世祖登極召先生於家改授國子祭酒又授中書左丞屢辭不允言行政事備載國史至元十八年三月戊戌薨於私第易簀不變年七十有三是日大雷電風拔木人無貴賤少長哭於門天下識與不識聞訃慨歎以為斯道斯民之不幸四月己酉葬李封村先塋之南既葬四方學者為位

會哭墓次而去先生嘗語其子曰我平生虛名所累竟不能辭官死後慎勿請謚立碑但書許某之墓四字使子孫識其處足矣及卒從其治命葬而無碑先生既沒三十三年為皇慶二年仁宗詔與宋九儒從祀宣聖廟庭明斯道之所自傳矣又二十三年為元統三年順帝命翰林直學士歐陽玄文其神道之碑遂勅賜故中書左丞集賢大學士國子祭酒贈正學垂憲佐運功臣太傅開府儀同三司封魏國文正公配敬氏子三師可師

遜師乎賀氏子一師敬皆追封魏國夫人先生閨門有禮中饋皆賢事公甚敬莫非先生導化之功也有魯齋集中庸語意門人記載語錄行於世

衍通次子

衍行二早卒

魯齋子

文簡公師可

衡長子

師可行一字可臣由河東按察副使歷衛輝襄陽廣平

懷孟路總管終通議大夫贈禮部尚書謚文簡公志趣
端正惜未究用有文集貽後配劉氏完顏氏合葬先塋

子一從宸

師遜

衡次子

師遜行二字遜卿未仕卒配焦氏合葬先塋子一從憲

師孚

衡第三子

師孚行三早卒

翰林承旨師敬

衡第四子

師敬行四字敬臣由監察御史歷治侍御史吏部尚書
中書參知政事國子祭酒太子詹事中書左右丞翰林
學士承旨知經筵事由西臺中丞拜御史中丞光祿大
夫明經務誠學尚節槩肖父風配田氏合葬先塋子三
從宜從宣從宗

魯齋孫

河東憲副從宸

師可子

從宸字希元積官山南僉憲監察御史終河東憲副配

朱氏合葬先塋子一紹祖

歸德知府從憲

師遜子

從憲字希先以蔭累遷湖廣行省理問歸德知府致仕
配王氏楊氏合葬先塋子二崇祖順祖

太史院經歷從宜

師敬長子

從宜行一字希政仕太史院經歷中書省照磨翰林國
史院經歷太常禮儀院判配萬氏合葬先塋之後

陝西左丞從宣

師敬次子

從宣行二字希文由太保府長史中書右三部照磨內
臺御史都水監都水福建按察使工部尚書河南湖廣
參政陝西左丞配趙氏乃蠻氏合葬先塋子四書童述
祖得山繩祖

監察御史從宗

師敬第三子

從宗行三字希魯由章珮監珍異庫提點歷監察御史
工部侍郎集賢學士終河南按察使配姚氏劉氏合葬
先塋之後

魯齋魯孫

禮部尚書紹祖

從宸子

紹祖字克學由秘書著作郎中書檢校南臺御史雲南省郎中樞密院經歷兵部侍郎甘肅按察使河南濟寧總管戶部尚書內侍御史禮部尚書正議大夫配王氏甯氏合葬先塋子二翦鳳

縣尹崇祖

從憲長子

崇祖行一字克孝以蔭授武主簿轉芮城平陸縣尹配

關氏合葬先塋子二大舍黑的

大使述祖

從宣次子

述祖行二字克紹以蔭授資成庫大使配湯氏合葬先

塋子一買驢

昭信校尉得山

從宣第三子

得山行三字克仁後名本前元任樞密院使洪武三年
任慶陽衛百戶歷西安平涼涼州山丹衛洪武二十八
年調甘州中護衛配程氏葬皋蘭山麓子二理善

魯齋玄孫

知縣翥

紹祖長子

翥行一字雲翰由儒士官至威遠縣知縣配馮氏李氏

子一智

五世孫

知事驥

志剛第三子

驥行三字彥德由貢士任湖廣常德府知事子三信侃

偉

六世孫

縣丞綸

姻第二子

綸行二字大本由貢士任真隸武進縣丞子五鎮銳鉞

錦鏞

審理偉

驥第三子

偉行二字季高由貢士任魯府審理子三泰和泰熙泰寧

七世孫

知縣泰和

偉長子

泰和行一字舜民由貢士任陝西武功知縣子八世道
世教世法世則世俊世傑世佐世佑

檢校泰寧

偉第三子

泰寧行三字舜卿貢士任江西瑞州府檢校子二世英
世芳

八世孫

主簿世禎

鏞第三子

世禎行三字汝瑞由貢士任直隸常熟主簿子一宗坤

知縣世道

泰和長子

世道行一字子傳由舉人任山東安仁知縣

訓導世教

泰和次子

世教行二字子授由貢士任直隸長垣訓導子一宗祀

知縣世同

泰來次子

世同行二字子野由貢士任山西嵐縣知縣子二養蒙

養心

九世孫

舉人宗曾

世俊子

宗曾字思約乙酉科舉人子二思君事君

生員俱未載紀

魯齋遺書卷十二

欽定四庫全書

魯齋遺書卷十三

附錄

元勅辭

上天眷命皇帝聖旨惟昔聖祖圖任相臣思與真儒共
成治效故資善大夫中書左丞集賢大學士兼國子祭
酒教領太史院事許衡以天民之先覺膺巖石之具瞻
聖學方湮惟洙泗之源是沂嘉謨入告非堯舜之道不

陳斥奸志靖於熙朝辭祿不忘於耕野迎推日策明厯象以授人時樂育英才居成均而教胄子乃眷鈞樞之列益昭模範之功允為裕考之賓師宜副慈皇之渥命爰申卹典用賁玄扃道德博洽斯謂文中立不倚斯謂正既嘉名之載易仍公秩之榮頒上期有知服茲無斁可贈榮祿大夫司徒謚文正公公主者施行大德元年十月
缺日

神道碑

祭酒歐陽玄撰

洪惟聖元度越千古世祖皇帝以天縱之資得帝王不傳之學上接伏羲神農黃帝堯舜禹湯文武以來數聖人之道統而為不世出之君河內許先生以天挺之才得聖賢不傳之學上接周公孔子曾思孟軻以來數君子之道統而為不世出之臣君臣遇合之缺都俞

之言所以建皇極立民命繼絕學開太平者缺一

日也猗歟盛哉先生既沒之三十二年為皇慶二年仁宗皇帝詔與宋九儒從祀宣聖廟庭明斯道之所自傳

矣又二十三年為元統三年今上皇帝勅制臣玄文其

神道之碑

缺

敬使刻之於是臣玄再拜

缺

論世祖之為君而稱述許先生之為臣則

見

缺

朝廷之間有

缺

良之氣象論許先生之為

臣而推世祖之為君則見

缺

國家之初當真元會合

之氣運故善

缺

生必以道統為先而後及功業則上

可以稱塞聖天子命臣作碑之初意下可以厭服天下

後世學者景慕之盛心也臣謹按先生家乘及嘗私淑

於父師者序而銘之先生以金太和九年己巳九月丙寅生於新鄭邑中幼有異質八歲入學從師問讀書欲何為師曰應舉取第耳曰如是而已乎師大奇之謂其識趣非常他日必有大過人者自顧章句儒非其師遂辭去年十餘有道士過門見之驚曰骨清神完目光射人苟非命世大賢即當神超八表人間富貴不足道也稍長嗜學如饑渴而精彊絕人世亂家貧無從得書聞有善本冒險數百里就而抄之讀之有疑即能有所折

衷歲壬辰天兵渡河為游騎所得其萬夫長酗酒殺人
為嬉先生從容曲譬卒革其暴久乃信其言如著龜人
賴全活者無筭萬夫長南征乃東去隱徂徠山遷泰安
之東館鎮尋遷大名扁其齋曰魯世因號曰魯齋先生
國家既有河朔遣官分道以試選士中者得占籍為儒
魏人力勸應試既中選留魏三年自挽鹿車載書還河
內魏人致僕馬不聽入洛求弟衍得之自洛適魏聞河
內政虐還自蘇門十餘年間雖顛沛流離行不愧影其

與人交中剛外和一芥取子必揆於義人與之居雖有
伎求馴致俱化所至學者翕然歸之察其誠至始留館
下既留誘掖忘倦身教屬屬言教循循於是師道日立
友道日親在魏友竇默蘇門友姚樞相與論辨探幽析
微詣者惛伏既得伊洛性理之書及程子易傳朱子論
孟集註中庸大學章句或問小學等書言與心會召向
所從游教以進德之基慨然思復三代庠序之法甲寅
世祖受地秦中聞先生名遣使者徵赴京兆教授先生

避之魏使者物色偕行廉布憲宣撫陝右傳教令授以京兆提學卜居鴈塔之東與同志講井田之制買園為義桑會得請還世祖即祚建元中統召先生於家既至謁歸既歸復召至上京入見上問所學以學孔子對留上所無幾以疾還燕明年自上京召數有敷對時相王文統用事而先生及姚樞竇默日被顧問默在上前屢斥其學術不正樞尤以才見嫉蓋竇言本出於先生文統亦頗疑之乃奏姚為太子太師竇為太子太傅先生

為太子太保外示尊禮內欲擯使疏遠姚寶拜命將入謝先生獨毅然辭謂二公曰禮師傅見太子位東西向師傅坐太子乃坐今能遽復此禮乎否則師道自我廢也二公懷制闕下辭文統聞斯言遂寢其命改授先生為國子祭酒寶為翰林侍讀學士姚為大司農先生亟辭以疾久乃予告還河內既而上京使狎至應命至燕病弗能往至元元年自燕復還先是有詔即家為校以業來學乃躬耕里中未嘗以詔示人至是召入省議事

旋踵求云丞相安童來謁欲勉留之退謂人曰時流皆欲輩行許先生吾見相去千百尋有詔趣赴省遂北行見上檀州諭之曰安童少不更事卿無負所學悉以傳之有嘉謀嘉猷語使入告對曰聖人道極高遠學者所得有淺深然當罄所知如聖詔其所不知不敢強也安童明敏有操守告以古人格言徃徃領悟第恐有間之者則難行耳自是預國大議時至都堂扈行上京咨訪日廣宿衛之士見先生入對舉手加額相慶曰是欲澤

被生民者上疏陳五事曰立國規摹曰中書大要曰為
君難曰農桑學校曰慎微累數千百言讀奏未徹上久
聽微有倦色先生即斂卷求退上肅然正襟危坐先生
乃再讀讀訖上嘉納之其餘論諫多削其藁世罕得聞
有頃辭疾聽五日一詣省賜西域名藥善酒俄許其還
繼召與太保劉秉忠左丞張文謙議朝儀官制多所詳
定阿哈瑪特請建尚書省總六部與中書角立上特用先
生為中書左丞先生求面辭不得見者再越數日奏所

議事畢自陳曰臣有三宜辭一非勲舊二茂才德三所學迂恐於聖謨神算未能盡合上曰用卿出朕意無事多讓先生辭不已上命從官掖之起有旨曰出既出及闕還奏曰陛下令臣出省耶上改容曰出殿門耳明日又辭遣近臣合刺合孫先諭止之強出視事至上京奏論阿哈瑪特罔上不道事不報因移疾謝機務丞相難之御史中丞博囉為之請上惻然召子師可諭使舉代對曰用人宜出上意臣下舉代恐開市恩覬覦之漸尋有

旨以國人世胄子弟就學遂篤意教事奏門生王梓劉
季偉韓思永耶律有尚呂端善姚燧高凝白棟蘇郁姚
燉孫安劉安中十二人為伴讀被旨咸驛致之以先生
為集賢大學士兼國子祭酒先生之為教精粗有序張
弛有宜而必本諸聖賢啟迪後學之方踰年諸生涵養
薰陶周旋中禮講貫適用上喜其業成自成之越三歲
以改葬親喪謁歸屬召赴行在遂請朝辭以行上命諸
老議其去留姚樞謂先生出處有關世運宜成其志更

命張文謙問所以告歸之意其對如初始元十四年召議改厯法仍以集賢大學士兼國子祭酒教領太史院事十七年授時厯成以疾屢告上禮貌隆至路朝賜杖內殿賜

關

在東宮聞之為言於上以驛送

還師可以河東按察副使改懷孟路總管以便養皆東宮請也且使宮臣諭曰先生近醫藥自輔無以道不行為憂十八年三月戊戌薨於私第之正寢易篋不變年七十三是日大雷電風拔木城中無貴賤少長哭於門

商言於塗農弔於野天下識與不識聞訃慨嘆四月乙酉葬李封村先塋之南既葬四方學者來會為位哭墓次而去先生真知力行實見允蹈齋居終日肅如神明嘗遇迅雷起前泰宇凝定不喪執守其為學也以明體達用為主其脩己也以存心養性為要其事君也以責難陳善為務其教人也以洒掃應對進退為始精義入神為終雖時尚柄鑒不少變其規矩也故君召輟往進輒思退方世祖急於親賢而先生篤於信己以是終無

枉尺直尋之意及夫仕不受祿人以為高則喟然嘆曰甚矣予之不幸而有是名也仕豈有不食君祿者哉食求無忝而已伐宋之舉一時名公卿人售攻取之畧先生言惟當修德以致賓服若以力取必戕兩國之生靈以決萬一之勝負及宋既平未嘗以失計為慊世祖亦未嘗以是少之臣嘗觀三代而下漢唐君臣未聞以道統繫之者當世儒宗或智足與知仁未足與居也宋濂洛數公克緒斯道然未聞有得君者世祖龍潛諸儒請

上其號曰儒教大宗師嗚呼漢唐宋創業之主烏得而
有是號哉此天以道統屬之世祖也先生出際斯運一
時君臣心以堯舜為心學以孔孟為學中外如出一喙
號公魯齋先生嗚呼魯者曾子傳道之器歷代佐命之
臣雖欲為此號豈可得也非天以道統屬之先生乎先
生之謀國譬之工師受命作室既得大木不肯斷而小
之是以寧不受工師之命而必使學焉後臣之道無愧
於伊尹寧不預平宋之功而必使以德行仁之言無負

於孟軻故中統至元之治上有不世出之君能表章其
臣繼述往聖之志下有不世出之臣能贊襄其君憲章
往聖之心於是我元之宏規有非三代以下有國家者
之可及矣及夫元貞大德高第弟子彬彬輩出致位卿
相為代名臣皇慶延祐之設科子師敬叅預大政以通
經學古之訓一洗隋唐以來聲律之陋致海內之士非
程朱子之書不讀又豈非其家學之效見諸已試者歟
先生平時頗病文籍之繁嘗曰聖人復出必大芟而治

之斯則周衰以來文勝之弊猶將有以正救於其間是
豈淺之為志者乎先生諱衡字仲平其先河內人父通
避地河南隱德弗耀今贈銀青榮祿大夫大司徒追封
魏國公謚惠和妣李氏追封魏國公夫人子男四師可
師遜師孚追封魏國公夫人敬氏子師敬封魏國公夫
人賀氏子先生閨門有禮中饋皆賢事公甚敬師可由
河東按察副使歷衛輝襄陽路總管終通議大夫廣平
路總管贈禮部尚書謚文簡志趣端正惜未究用有文

集遺後師遜師孚未仕卒師敬由監察御史踐敷中外
歷治書侍御史吏部尚書中書叅知政事國子祭酒太
子詹事中書左右丞兩為翰林學士承旨知經筵事今
由西臺中丞拜御史中丞階光祿大夫明經務誠學上
節槩肖父風女三長適于章儒者餘早逝孫男六長從
憲以蔭累遷湖廣行省理問以歸德知府致仕次東孫
天次從宸積官山南憲僉監察御史終河東憲副廼先
生之嫡宗孫也次從宜太史院經歷中書省照磨今翰

林國史院經歷次從宣太保府長史中書左三部照磨官
次從宗章珮監異珍庫提點孫女五長適廣東宣慰使
都元帥甯居仁封覃懷郡夫人次適太禧院管勾覃質
次適翰林應奉蕭璘次適寧陵簿張構次適阜城尉張
恕曾孫六長崇祖次紹祖秘書著作從宸之嫡子也次
書童文童禮童武童曾孫女四皆幼先生有魯齋集及
中庸語意門人記載語錄行於世昔王文忠公磐論先
生曰吾年八十閱人多矣平生力學不知聖道之所在

非缺

幸幾失此人大德元年贈大司徒謚文正制詞
有曰聖學方湮惟洙泗之源是泝嘉謀入告非堯舜之
道不陳至大三年加贈太傅追封魏國公制詞有曰天
非繼聖學之隆緒則不生命世之大才國欲與王道以
比隆肆用為承民之先覺姚文公燧作祠堂記則謂五
百年必有王者興其間必有名世者出惟公足以當之
蓋太祖皇帝建國丙寅而先生生於己巳上距宋慶元
庚申朱子之卒纔十年當興王之會續傳道之業必有

數存焉世祖嘗稱其論事多與太祖之言合至取祖訓示之玄生晚學陋何以知先生然嘗誦諸儒之說而想望其餘光焉先生之於道統非徒托諸言語文字之間而已也蓋自慎篤之功充而至於天德王道之蘊故告世祖治天下之要唯曰王道及問其功則曰三十年有成是以啟沃之際務以堯舜其君堯舜其民為己任由其真積力久至誠交孚言雖剴切終無以忤至於其身之進退則凜然萬夫之勇何可以利祿誘而威武屈也

晚年義精仁熟躬脩四時之和道出萬物之表無事而
靜則太空晴雲卷舒自如應物而動則雷雨滿盈草木
甲拆事至而不疑事過而無迹四方之人聞之而知敬
望之而知親近之而知愛遠之而知慕求其所以然則
惟見其胸中磅礴浩大人欲淨盡天理流行動靜語默
無往而非斯道之著行也又嘗竊論之先生天資之高
固得不傳之妙於聖賢之遺經然純篤似司馬君實剛
果似張子厚光霽似周茂叔英邁似邵堯夫窮理致知

擇善固執似程叔子朱元晦至於體用一原顯微無間
超然自得於不動而敬不言而信之域者又有濂洛數
君子所未發者焉宜夫抗萬鈞之勢而道不危擅四海
之名而行無毀近代元豐之異論淳熙之分爭先生處
之寧有是哉臣玄再拜稽首銘曰世降遼古大樸曰雕
天吏不作治教寂寥帝恫我民眷求有德世祖齊聖作
其建極臣有許公身任斯道為仁肫肫制行慥慥昔公
在野世難荐臻精義致用屈蠖之伸心樂則顏志任則

伊朝夕思惟天將啟之朋來遠方以辯以問會融一貫
冰釋理順世祖居潛時號儒宗多士既歸功德曰崇名
公起家斯世將泰灼知俊心天地正大既握乾符尊履
五位利見大人乃在九二覃懷之居輶車十來屢進亟
退求福不回論議上所德容休休獻可替否言直以道
上曰仲平汝左朕丞其悉爾學資朕股肱惟誠惟一以
結主知惟明惟哲其止也時初問伐國對不以兵上遠
公猷不在宋平官盛既廩公耻素餐敬事後食匪為苟

難近臣貴胄世荷國寵我淑以道國收其用小學功隳
大學陵節我教多術循循無越惟聖有謨載範其驅以
步以趨疇敢侮予自古在昔氣化推移仁人之缺為世
盛衰凡今有生孰司榮悴惟道為大與天罔墜世祖繼
天惟天生賢道統有在民彞賴焉有德有言有子有孫
皇命作誅詒厥永存至元元年歲次乙亥冬十一月己
卯朔二十六日甲辰第四子光祿大夫御史中丞師敬
立於石

行實

祭酒耶律公撰

公名衡字仲平懷慶河內人金太和己巳生於河南新鄭寓舍壬辰北渡隱居大名遷居於衛甲寅京兆宣撫使廉公奉潛藩命來徵乙卯授京兆提學辭不受中統元年五月應召北上二年五月授太子太保力辭不受改國子祭酒九月以疾辭歸三年九月應召北上至元年正月辭歸二年十月應召北上詔入省議事四年正月辭歸十一月應召北上六年奉詔定官制七年正月

拜中書左丞力辭不允八年四月改集賢大學士兼國
子祭酒十年七月以遷葬辭歸十三年七月應召北上
脩授時歷十五年三月授集賢大學士兼教領太史院
事十七年春歷成八月辭歸十八年三月薨年七十三
皇慶二年詔與宋儒周程張邵司馬朱張呂九人從祀
夫子廟庭先生幼有異稟賦性端慤與羣兒嬉即盡坐
作進退周旋之節羣兒莫敢犯年七八歲後學於鄉師
時金末國家多事學校廢弛惟農隙之際下第老儒會

閭里正句讀以糊口耳先生凡三易師焉所授書輒
不忘嘗問其師曰誦書欲何為師曰應舉取第耳曰如
此而已乎師大奇之每從質句讀訓解必問其肯義師
辭於父母曰此兒穎悟非常他日必有大過人者流離
之際吾聊以遣日豈能為之師乎父母固請而師卒遁
去亂後先生知三師皆遇難而無後每歲時設位祭之
終身

元史

許衡字仲平懷之河內人也世為農父通避地河南以
泰和九年九月生於新鄭縣幼有異質七歲入學授章
句問其師曰讀書何為師曰取科第耳曰如斯而已乎
師大奇之每授書又能問其旨義久之師謂其父母曰
兒穎悟不凡他日必有大過人者吾非其師也遂辭去
父母強之而不能止如是者凡更三師稍長嗜學如饑
渴然遭世亂且貧無書嘗從日者家見書疏義因請寓
宿手抄歸既逃難徂徠山始得易王輔嗣說時兵亂中

衡夜思晝誦身體力踐之言動必揆諸義而後發嘗暑中過河陽渴甚道有梨衆爭取啖之衡獨危坐樹下自若或問之曰非其有而取之不可也人曰世亂此無主曰梨無主吾心獨無主乎轉魯留魏人見其有德稍稍從之居三年聞亂且定乃還懷往來河洛間從柳成姚樞得伊洛程氏及新安朱氏書益大有得尋居蘇門與樞及竇默相講習凡經傳子史禮樂名物星厯兵刑食貨水利之類無所不講而慨然以道為己任嘗語人曰

綱常不可一日而亡於天下苟在上者無以任之則下之任也凡喪祭娶嫁必徵於禮以倡其鄉人學者寢盛家貧躬耕粟熟則食粟不熟則食糠覈菜茹處之泰然謳誦之聲聞戶外如金石財有餘即以分諸族人及諸生之貧者人有所遺一毫弗義弗受也樞嘗被召入京師以其雪齋居衡命守者館之衡拒不受庭有果熟爛墮地童子過之亦不睨視而去其家人化之如此甲寅世祖出王秦中以姚樞為勸農使教民耕植又思所以

化秦人乃召衡為京兆提學秦人新脫於兵欲學無師
聞衡來人人莫不喜幸來學郡縣皆建學校民大化之
世祖南征乃還懷學者攀留之不得從送之臨潼而歸中
統元年世祖即皇帝位召之京師時王文統以言利進
為平章政事衡樞輩入侍言治亂休戚必以義為本文
統患之且竇默日於帝前排其學術疑衡與之為表裏
乃奏以樞為太子太師默為太子太傅衡為太子太保
陽為尊用之實不使數侍上也默以屢攻文統不中欲

因東宮以避禍與樞拜命將入謝衡曰此不安於義也姑勿論禮師傅與太子位東西鄉師傅坐太子乃坐公等度能復此乎不能則師道自我廢也樞以為然乃相與懷制立殿下五辭乃免改命樞大司農黜翰林侍講學士衡國子祭酒未幾衡亦謝病歸至元二年帝以安童為右丞相欲衡輔之復召至京師命議事中書省衡乃上疏曰臣性識愚陋學術荒疎不意虛名偶塵聖聽陛下好賢樂善舍短取長雖以臣之不才自甲寅至今

十有三年凡八被詔旨中懷自念何以報塞又日者面奉德音叮嚀懇至中書大務容盡臣言臣雖昏愚荷陛下知待如此其厚敢不罄竭所有裨益萬分孟子以責難於君謂之恭陳善閉邪謂之敬孔子謂以道事君不可則止臣之所守大意蓋如此也伏望陛下寬其不佞察其至懷則區區之愚亦或有小補云乃陳立國規模中書大要為君難及農桑學校等事詳見奏議帝深嘉納之阿哈瑪特為中書平章政事領尚書省六部事因擅

權勢傾朝野一時大臣多阿之衡每與之議必正言不
少讓已而其子又有僉樞密之命衡獨執議曰國家事
權兵民財三者而已今其父典民與財子又典兵不可
帝曰卿慮其反耶衡對曰彼雖不反此反道也阿哈瑪特
由是銜之亟薦衡宜在中書欲因以事中之俄除左丞
衡屢入辭免帝命左右掖衡出衡出及闕還奏曰陛下
命臣出豈出省耶帝笑曰出殿門耳從幸上京乃論列
阿哈瑪特專權罔上蠹政害民若干事不報因謝病請解

機務帝惻然召其子師可入諭旨且命舉自代者衡奏
曰用人天子之大柄也臣下汎論其賢否則可若授之
以位則當斷自宸衷不可使臣下有市恩之漸也帝久
欲開太學會衡請罷益力乃從其請八年以為集賢大
學士兼國子祭酒親為擇蒙古弟子俾教之衡聞命喜
曰此吾事也國人子大朴未散視聽專一若置之善類
中涵養數年將必為國用乃請徵其弟子王梓劉季偉
韓思永耶律有尚呂端善姚燧高凝白棟蘇郁姚燾孫

安劉安中十二人為伴讀詔驛召之來京師分處各齋以為齋長時所選弟子皆幼稚衡待之如成人愛之如子出入進退其嚴若君臣其為教因覺以明善因明以開蔽相其動靜以為張弛課誦少暇即習禮或習書筭少者則令習拜跪揖讓進退應對或射或投壺負者罰讀書若干遍久之諸生人人自得尊師敬業下至童子亦知三綱五常為生人之道十年權臣屢毀漢法諸生廩食或不繼衡請還懷帝以問翰林學士王磐磐對曰

衡教人有法諸生行可從政此國之大體宜勿聽其去
帝命諸老臣議其去留竇默為衡懇請之乃聽衡還以
贊善王恂攝學士劉秉忠等奏乞以衡弟子耶律有尚
蘇郁白棟為助教以守衡規矩從之國家自得中原用
金大明歷自大定是正後六七年氣朔加時漸差帝
以海宇混一宜協時正日十三年詔王恂定新歷以為
歷家知歷數而不知歷理宜得衡領之乃以集賢大學
士兼國子祭酒教領太史院事召至京衡以為冬至者

歷之本而求歷本者在驗氣今所用宋舊儀自汴還至京師已自乖舛加之歲久規壞不叶乃與太史令郭守敬等新製儀象圭表自丙子之冬日測晷景得丁丑戊寅己卯三年冬至加時減大明歷十九刻二十分又增損古歲餘歲差法上考春秋以來冬至無不盡合以月食衝及金木二星距驗冬至日躔校舊歷退七十六分以日轉遲疾中平行度驗月離宿度加舊歷三十刻以綫代管闕測赤道宿度以四正定氣立損益限以定日之

盈縮分二十八限為三百三十六以定月之遲疾以赤道變九道定月行以遲疾轉定度分定朔而不用平行度以日月實合時刻定晦而不用虛進法以躔離朏朒定交食其法視古皆密而又悉去諸厯積年月日法之傳會者一本天道自然之數可以施之永久而無弊自餘正訛完缺蓋非一事十七年厯成奏上之賜名曰授時厯頒之天下六月以疾請還懷皇太子為請於帝以子師可為懷蓋路總管以養之且使東宮官來諭衡曰

公母以道不行為憂也公安則道行有時矣其善藥自
愛十八年衡病革家人祠衡曰吾一日未死寧不有事
於祖考扶而起奠獻如儀既徹家人餽怡怡如也已而
卒年七十三是日大風拔木雷電懷人無貴賤少長皆
哭於門四方學士聞訃皆聚哭有數千里來祭哭墓下
者衡善教煦煦雖與童子語如恐傷之故所至無貴賤
賢不肖皆樂從之隨其才昏明大小皆有所得可以為
世用所去人皆哭泣不忍舍服念其教如金科玉條終

身不肯忘或未嘗及門傳其緒餘而折節力行為名士者往往有之聽其言雖武夫俗士異端之徒無不感悟者丞相安童一見衡語同列曰若輩自謂不相上下蓋十百而千萬也翰林承旨王磐氣蓋一世少所與可獨見衡曰先生神明也大德二年贈榮祿大夫司徒謚文正至大二年加正學垂憲佐運功臣太傅開府儀同三司封魏國公皇慶二年詔從祀孔子廟庭延祐初又詔立書院京兆以祀衡給田奉祀事名魯齋書院衡居魏

時所署齋名也

通鑑

元以許衡為集賢大學士國子祭酒先是竇默言於世祖曰三代所以歷數長久風俗純粹者皆自設學養士所致方今宜建學立師博選貴族子弟教之以示風化之本張文謙繼以為請至是命衡為之衡自設學家事悉委其子師可凡賓客來學中者皆謝絕之嘗曰學中若應接人事諸生學業必有所妨外人謗怨是自己事

諸生學業是上命也每謂蒙古生質朴未散視聽專一
苟置之好伍曹中涵養之數年將來必能為國家用乃
奏舊弟子散居四方如韓思永蘇郁耶律有尚孫安高
凝姚燧姚燾等皆驛致館下為伴讀欲其夾輔匡弼薰
陶浸潤而自得之也又欲令蒙古生習學美術乃自唐
堯戊辰距至元壬申凡三千六百五年編其世代歷年
為一書令諸生誦其年數而加減之又教諸生習顏魯
公字復選蒙古生年長者習拜及受宣拜詔儀釋奠冠

禮小學生書倦則令習跪拜揖讓應對進退之節或投
壺習射負者罰讀書若干遍每說書不務多唯肯款周
折若未甚領解則引證設譬必使通曉而後已嘗問諸
生此章書義若推之自身今日之事有可用否大凡欲
其踐行不貴徒說也每謂書中無疑看得有疑有疑却
看得無疑方是有功嘗曰敬敷五教在寬則是教者當
以寬容存心也今日學中大體雖要嚴密然就中節目
須且寬緩蓋人品不一有早成者有晚成者有可成其

大者有可成其小者且一事有所長必一事有所短千萬不同遽難以強之也且教人不止各因其材又當隨其學之所至而漸進之教人與用人正相反用人當用其所長教人當於其所短故衡之教人也恩同父子義若君臣因其所明開其所蔽而納諸善時其動息而弛張之慎其萌蘖而防範之日漸月漬不自知其變也日新月盛不自知其化也以是凡為弟子者皆能自立為世用矣又言為學者治生最為先務苟生理不足則於

為學之道有所妨彼旁求妄進及作官嗜利者殆亦寃
於生理之所致也士君子當以務農為生商賈雖為逐
末亦有可為者果處之不失義理或以姑濟一時亦無
不可若以教學與作官規圖生計恐非古人之意也
元國子祭酒許衡乞罷許之陞辭而還至懷孟簡絕人
事常居山下課童僕事耕墾衡居家勤於自治公愛兼
盡不嚴而整閨門之內若朝廷嚴夫婦相待如賓凡喪
祭一遵古制不用佛老懷孟化之旁舍有僧德公者年

百餘年嘗謂其徒曰老僧苦行百年亦不能作佛徒為不孝之人羞見祖宗於地下但願小僧輩還俗以壽汝祖宗之嗣自是不復度弟子蓋化之也

中統書

己酉竇默與王鶚面論王文統不宜在相位薦許衡代之帝不懌而罷

辛巳詔許衡即其家教懷孟生徒

丙午以許衡為國子祭酒初以衡為太子太傅以不敢

當師傅禮辭不拜故有是命

戊寅詔竇默許衡乘驛至開平

至元書

戊子詔許衡於懷孟

戊申以許衡為國子祭酒

丙午以國子祭酒許衡為中書左丞

丙子帝御高果後行宮觀劉秉忠許衡等所起朝儀大
說舉酒賜之

乙酉許衡以老疾辭中書機務除集賢大學士國子祭酒納還舊俸詔別以新俸給之

壬申將相大臣將以聲罪南發為請驛詔姚樞許衡徒單公履等問計公履對曰乘破竹之勢席卷之號此其時矣帝然之

丙戌劉秉忠等上言許衡疾歸若以太子贊善王恂主國學庶幾衡之規模不敢廢墜從之

甲戌以大明歷浸差命王恂與江南日官置局更造新

歷以樞密副使張易董其事易恂奏今之歷家徒知歷書罕明歷理宜得者儒如許衡者商訂詔衡赴京師世祖問竇默欲求如魏徵者默對曰犯顏諫諍剛毅不屈則許衡其人也

燕王問王恂元以王恂為太子贊善燕王嘗從容語恂以守心之道恂曰嘗聞許衡言人心猶印板然板本不差雖摹千萬紙皆不差本既差矣摹之於紙無不差者至元十五年壬午置太史院王恂掌院事集賢大學士

兼國子祭酒許衡領焉

庚辰以許衡言遣使至杭州等處取在官書籍板刻至京太史令王恂等言建司天臺於大都像儀圭表皆銅為之宜增銅表高至四十尺則景長而真又請上都洛陽等五處分缺儀表各選建候官從之

十七年丁亥許衡致仕官其子師可為懷孟路總管以便侍養

十八年三月戊戌許衡卒

考歲畧

先生十餘歲時有道士謁其門謂父母曰此兒骨清而神全目光射人當謹視之苟非名冠天下即當神遊八表馳騁方外者也人間富貴不足道耳但兩額頗暗清節有餘而安逸不足惜乎父母俱不得見之

時歲饑民食橡栗或易子而食先生聞人有書即往求觀父母危之每與俱往人厭其迂

時民間徭戍繁迫舅氏適典縣史先生從授吏事參撫

名議考求立法用刑之原久之以應辦宣宗山陵州縣
追呼旁午代舅氏分辨因見執政方怒舅氏不敢見及
見先生應對則以溫言撫慰及還嘆曰民不聊生而事
督責以自免吾不為也遂不復詣縣而決意求學

是時國日以蕧民皆轉徙無從師授亦無書籍父母知
世將亂因欲稍知占候之術以為避難計遂令與占者
游故於推步占候之家見書疏義皆散亂毀缺先生凡
三往就宿其家皆手錄之由是刻意墳典欲求古者為

治為學之序操心行己之方一言一行必質諸書故雖
亂離之際人亦稍稍從學焉

亂後先生隱居於魏時實默子聲以針術得名累被朝
廷徵訪亦隱於魏最知敬先生每相遇危坐終日出入
經傳泛濫釋老下至醫藥卜筮諸子百家兵刑貨殖水
利算數之類靡不研精雪齋姚樞公茂方以道學自任
聞先生苦學力行因過魏相與聚居剖微窮深忘寢與
食

壬寅雪齋隱蘇門傳伊洛之學於南士趙仁甫先生即詣蘇門訪求之得伊川易傳晦庵論孟集註中庸大學章句或問小學等書讀之深有點契於中遂一一手寫以還聚學者謂之曰昔者授受殊孟浪也今始聞進學之序若必欲相從當悉棄前日所學章句之習從事於小學洒掃應對以為進德之基不然當求他師衆皆曰唯遂悉取向來簡帙焚之使無大小皆自小學入先生亦旦夕講誦不輟篤志力行以身先之雖隆冬盛暑不

廢也諸生出入惴栗惟謹客至則歡然延接使之惻然
動念漸濡善意而後出己酉先生年四十一自得伊洛
之學冰釋理順美如芻豢嘗謂終夜以思不知手之舞
之足之蹈之是歲有讀易私言先生於書於易尤多致
力然每學者請問則必從事於小學卒未嘗以此語也
庚戌春先生力疾還鄉里過衛聞懷之政猶苛虐遂止
蘇門與雪齋相比以便講習且為還鄉之漸辛亥雪齋
赴徵先生獨處蘇門便有任道之意

甲寅王府徵教授京兆避於大名使者訪焉遂偕往乙卯廉公希憲宣撫關中奏擬授先生京兆提學仍月俸力辭不受往返凡六七不能强也

庚申上在正位宸極應詔北行至上都入見問所學曰孔子問所長曰虛名無實誤達聖聽問所能曰勤力農務教授童蒙問科舉何如曰不能上曰卿言務實科舉虛誕朕所不取七月還燕

辛酉三月應召至上都時王文統秉政深忌雪齋諸公

先生素無因緣而無憚也及竇公力排其學術之非必至誤國文統始疑先生唱和其說五月授雪齋太子太師竇公太子太傅先生太子太保外佯尊之內實不欲備顧問也竇公既以言文統不中欲依春宮以避禍先生獨以為不可曰姑舍其不安於義者且以一事言之如中古以來師傳與太子相見則就西位東向太子東位西向公能為此事否不然是師道自我而廢也雪齋亦贊其說相與懷麻力辭於闕下凡數日始從其請由

是改授雪齋大司農竇公翰林侍講學士先生國子祭酒既拜命以疾辭九月得告南還仍奉旨教授懷孟路子弟

壬戌九月召至大都先生居都下也假館於道庵中凡權貴豪右延請皆不往惟姚竇二公時時相過始終如一

中書左丞張公仲謙由大名宣撫復入中書好善最篤自初見先生屢請執弟子禮先生拒之而止一時賢俊

多所薦拔凡中原士夫頗依賴之而公亦以復古進賢
為已任每先生進退之際必往返道達上意挽之留之
冀有以不屑去也然性褊數忤倖臣故被譴責至是遣
人求言先生貽書曰弔者在門慶者在閭一倚一伏孰
知其初君子存誠克己就義始若甚難終知甚易可委
者命可憑者天人無率爾事有偶然舍苗不耘固為有
害助而堰之其害甚大既徵於色又發於聲天道無他
庸玉汝成

至元元年正月懇辭還懷州六月迅雷起中堂時卜築於此而未遷也先生與一二從者視役其下雷雨驟至火光滿室墁匠從者昏仆而先生弗動也

二年十月召至大都即陳雷震不宜入見上不許十二月奉旨入省議事先生以疾辭丞相安童素聞先生名心慕之乃就訪於行館及還心悅誠服念念不釋者累日謂左右若輩自謂相去幾何蓋什百而千萬也是豈繒繳之可及耶翼日先生與丞相答禮

三年春二月召至檀州後山面奉德音竇漢卿獨言王
以道當時汝何為不言豈孔子教法使汝若是耶汝不
遵孔子教法自若是耶往者不咎今後勿爾也是云是
非云非可者行不可者勿行我今召汝無他省中事前
雖命汝汝意猶未悉今面命汝人皆譽汝想有其實汝
之名分其斟酌在我國家所以無失百姓所以得安其
謀謨在汝謂汝年老未為老謂汝年小不為小正當黽
勉從事毋負汝平生所學安童尚幼若未更事汝謹輔

導汝有嘉謨先告安童以達於我我將擇焉先生對曰
聖人之道至大至遠而學者所得有淺深臣平生雖讀
其書所得甚淺然既叨特命願罄所知者言之所不知
者亦不能強也安童聰明且有執持告以古人言語悉
能領解臣所知者盡告之但慮中有人間之則難行外
用勢力納人其間則難行臣入省之日淺淺見如此未
知是否

夏四月自分省召至上都屢蒙訪問遂奏陳時務五事

聖旨諭九令善寫以進朕當詳之一曰立國規摹歷論
前代建國北方奄有中夏如魏如遼如金能用漢法故
享國長久今國家當行漢法事在不疑然萬世國俗累
朝勲貴一旦驅之從臣僕之謀改就亡國之俗其時勢
甚難非三十年不能成功齊一吾民使富實興學校練
甲兵隨時損益裁為定制如臣等輩皆足以任此在陛
下篤信而堅守之不雜小人不營小利不責近效不惑
浮言庶幾可以得天下之心成至治之效二曰中書大

要令仕者宜頒俸祿使可資以為養未仕者宜明立條式俾就銓敘則失職之怨少紓矣外設監司糾察污濫內由吏部考訂資歷則踰分之求漸可息矣再任三任抑高而舉下則人才爵祿可得而差次之矣至於貴家世襲品官任子驅良戶口之制亦不可緩也若夫得行與不得行在上之委任者何如而能行與不能行在執政者得人耳其三曰為君難其目曰踐言曰防欺曰任賢曰去邪曰得民心曰順天道六者乃為君難之目舉

其要則修德任賢愛民三者而已此謂治本治本則綱紀可布法度可行治功可必矣其四曰農桑學校今國家徒知斂財之巧不知生財之由不惟不知生財而斂財之酷又害於生財矣徒知防人之欺不知養人之善欲其不欺非衣食以養其生禮義以養其心不可也徒患法令之不行不患法令無可行之地誠能優重農民勿擾勿害盡毆游惰之民歸之南畝歲課種樹懇諭而篤行之十年之後當倉盈府積非今日比矣自上都東都

下及司縣皆設學校使皇子以至庶人之子弟皆從事於學日明父子君臣之大倫自洒掃應對至於平天下之要道十年以後上知所以御下下知所以事上上下睦又非今日比矣其五曰慎微文多削藁先生每有奏對或欲召見則上自擇善譯者然後見之或譯者言不逮意上已領悟或語意不倫上亦覺其非而正之至燕先生以疾不復入省因求還家養疾許之

四年十一月召至大都六年奉旨議官制先生與左丞

張公贊善王公同奏官制送入中書先生歷考古今設官分職之本沿革之由與夫上下統屬之序其權攝增置冗長倒置行之有弊者率皆不取自省部郡縣體統之正左右臺院輔弼之制內外百司聯屬控制之差后妃儲藩隆殺之防悉圖為定制以聞其所以取捨欲著成書而未暇也七年正月拜中書左丞入見奏事畢辭於上前不允大槩以為臣之所以不敢承受者有三一則臣一介書生遽當大任非勲非舊不足以服內外之

人二則無德無才不能辨陛下責任之事三則臣之所學迂遠於陛下聖謨神筭未盡脗合陛下知臣未盡信臣未至直以虛名誤蒙採擢臣若不自度冒當聖眷其旋至悔咎必矣上曰此事皆出朕意無復多讓先生再三懇請上命左右掖出左右掖之曰有旨令先生出矣將至門復還奏曰陛下令臣出當自出省去耶上曰出殿門爾爾後連日求辭不免

夏五月先生隨省赴上都因具奏阿哈瑪特專權無上蠹

國害民等事渠由是銜之或曰先生夜寢踈閣無他防
備卒有橫逆柰何先生曰主上在此何得敢爾脫或有
之亦命也人生不應有如許計較

阿合馬欲以其子典兵柄先生以為不可謂國家事權
兵民財三者而已父位尚書省典民與財而子又典兵
太重上曰卿慮阿哈瑪特反側耶先生曰此反側之道也
古者姦邪未有不由如此者上以此語語西相相詰先
生曰公何以言吾反先生曰吾言前世之反者皆由權

重君誠不反何為由其道相復之曰公實及耳人所嗜
好者勢力爵祿聲色公一切不好欲得人心非反而何
先生曰果以君言得罪亦無所辭

先生以病告辭丞相安圖不許臺官博囉奏聞聖意憫
惻召其子師可入見喻以舉官自代先生奏用人者天
子之柄臣下泛論其賢則可若授之以政則當斷自宸
衷不可使臣下有覬覦市恩之漸

先生之教人也恩同父子義若君臣因其所明開其所

蔽而納諸善時其動息而張弛之慎其萌蘖而防範之
其日漸月漬不自知其變也日新月盛不自知其化也
其言談舉止望而知其為先生弟子卒皆為世用也
襄陽下上欲遂有江南先生以為不可其辭甚秘

十年諸生廩餼不繼稍稍引去又權臣屢毀漢法四月
召赴上都議事面請還鄉里上命眾議其去留雪齋云
先生出處關時世之污隆我輩不可強之先生自處審
矣今日直當以聖賢待之遂令辭奏曰國學設立於今

三年教專嚴謹諸生學問進長許某所以告辭之意言
為年老殘疾上世有數喪未葬欲歸了此事其意甚哀
此係人子孝道之事宜賜允從由是得告南歸先生至
懷簡絕人事常居山下課僮僕事耕墾

十三年七月使者來召議改歷十七年二月測驗已周
歷事告成自先生入院恩眷愈缺
必問先生

安否病則賜藥賜杖至是入見皆缺奏事上令先生起
賜坐勞問久之六月疾益進八月得遂還家就除師可

懷孟路總管以便供給

十八年春先生疾甚醫者診之曰偏陰偏陽謂之疾今六脉皆平先生其少瘳乎先生曰久病而脉平者不治吾殆將不起矣遂不服藥頃之稍得適仲春祭祀先生曰吾一日未死可不有事於祖考乎遂力疾奠獻如禮既徹家人餽怡如也遂曳杖於門曰予心怍怍然瞑目坐久之曰死生何異人精神能有幾世事何時窮遂發嘆歌子朱子睡起林風瑟瑟覺來山月團團身心無累久

輕安況有清涼池館句穩翻嫌白俗情高却笑郊寒蘭
膏元自少陵殘好處金章不換歌罷奄然而逝俄而雷
電晦冥大風拔木城中老幼往哭其門征商過客相唁
於途雖農夫里婦亦嘆息焉先生嘗與師可曰我平生
虛名所累竟不能辭官死後慎勿請諡立碑必不可也
但書許某之墓四字使子孫識其處足矣賢耶不賢耶
碑於人何有至是從其治命葬而無碑既葬四方學者
有不遠數千里而來哭於墓者蒲人王楫年踰六十衰

經赴葬缺

曰門人哀禮歟楫曰吾師也術藝之師歟賓主之師歟吾猶懼乎報之無從吾將以愧夫王通之門人耳先生去世朝野識與不識莫不哀傷以爲斯道斯民之不幸

先生居家勤儉強於自治公愛兼盡不嚴而整閨門之內若朝廷然與夫人敬氏相待如賓而夫人謙順自牧周旋道義先生亦賴其內助焉

先生天資宏毅卓然有守其恭儉正直出於天性雖艱

危窮阨之際所守益堅好學不倦聞一善言善行不啻
饑渴於名利紛華畏若探湯誠心自然天下信之逮元
以來十被召旨未嘗不起然卒不肯枉尺直尋而去每
入奏對以格君心為己任氣質雍容誠敬交孚言雖切
直而無忤也衛士或舉手加額曰是欲澤被生民堯舜
其君者也至於進退出處之際勇於就義凜然不可以
勢利誘而威武屈也逮其晚年義精仁熟身被四時之
和道出羣物之表四方聞之知敬望之知畏親之知愛

遠之知慕蓋其胸中浩大無一毫人欲之私純乎天理之正故其動靜語默之際周旋出入之頃無往而非斯道之流行矣

先生著述曰小學大義乃甲寅歲在京兆教學者小學口授之語曰讀易私言是先生五十後所作曰孟子標題嘗以教其子師可曰四箴說中庸說語錄等書乃雜出於衆手非完書也

翰林承旨鹿庵王公磐襟宇蓋世少所許可獨敬禮先

生每相語則曰先生神明也磐老矣徒增愧縮爾及先生計音至則曰設若朝廷賜諡先生非文正不可後世有知先生者不易磐之言矣

先生居鄉里凡喪葬亦遵古制不用二氏懷州士夫家因以為俗二氏聞風亦有效之者每遇其徒未嘗面詆其非但從容款語其人已不覺內愧發赤或涕出悔其陷溺之深也近舍有德公者年百餘歲嘗謂先生曰老僧苦行百年亦不能作佛徒為不孝之人羞見祖宗於

地下但願勸小僧輩曷若還俗以壽汝祖宗之嗣此化不度一人

先生平生嗜朱子學不啻饑渴凡指示學者一以朱子為主或質以他說則曰賢且專主一家則心不亂及江左混一始得閱其文亦病其太多

國學事蹟

先生自得小學書則主於此書以開導學者嘗寄其子書曰小學四書吾敬信如神明然能明此他書雖不治

可也八年授集賢大學士國子祭酒先生方居相府丞相傳旨令教蒙古生四人後又奉旨教七人至是有旨令四方及都下願受業者俱得預其列即今南城之舊樞密院設學先生自開學家事悉委其子師可凡賓客來學中者皆謝絕之先生嘗謂學中若應接人事諸生學業必有所妨外人謗咎是我一已之事諸生學業乃上命也日令家具早膳午膳以老疾日西不復食矣先生時年六十有二以宿疾當忌鹽肉食麵三年且以治

法不可以補而體力復不可於瀉故日節飲食未嘗敢
至於飽以為飽則必有補邪氣也然朝夕莅事畧無老
人疲倦之意

先生欲以蒙古生習學算術遂自唐堯戊辰距至元壬
申凡三千六百年編其世代歷年為一書令諸生誦
其年數而加減之

先生教諸生習字必以顏魯公為法嘗曰古者民無所
知聖人御世有以教之然聖人不可久生於世故制為

文字以記其言文字之始義取記言而已後世習字書者多少說話書固六藝之一程先生謂一向好著亦自喪志然其作字時甚敬謂只此是學此為可法

諸生讀書之暇先生令蒙古生年長者習拜及受宣拜詔儀釋奠冠禮時亦習之小學生有倦意令習跪拜揖讓進退應對之節或投壺習射負者罰讀書若干遍

先生說書章數不務多唯懇款周折若未甚領解則引證設譬必使通曉而後已嘗問諸生此章書義若推之

自身今日之事有可用否大凡欲其踐行而不貴徒說

也先生嘗曰世謂能

缺

者可以驕人至於能讀書者

亦可以驕人諸生講書但使之省解可也何必要他會說及見學者能有疑問先生喜氣溢於眉宇嘗謂書中無疑看得有疑有疑却看得無疑方是有功

先生嘗曰敬敷五教在寬君子以教思無窮容保民無疆則是為教者當以寬容存心也今日學中大體雖要嚴密然就中節目須寬緩大槩人品不一有夙成者有

晚成者有可成其大者有可成其小者且一事有所長
必一事有所短千萬不同遽難以強之也學記自一年
離經辨志至九年知類通達強立而不反其始終節次
幾多積累必不可以苟且致之故教人不止各因其材
又當隨其學之所至而漸進也蓋教人與用人正相反
用人當用其所長教人當教其所短

先生嘗謂蒙古生質朴未散視聽專一苟置之好伍曹
中涵養之數年將來必能為國家用乃奏召舊弟子散

居四方者王梓韓思永蘇郁耶律有尚孫安高凝姚燧
及其弟燾劉季偉呂端善劉安中白棟皆驛致館下為
伴讀欲其夾輔匡弼薰陶浸潤而自得之也或謂先生
何不博選時俊而獨用其門生曰我但教人而已非用
人也方以我之拙學教人他人從否未可知也

先生嘗言為學者治生最為先務苟生理不足則於為
學之道有所妨彼旁求妄進及作官嗜利者殆亦窘於
生理之所致也諸葛孔明身都將相死之日廩無餘粟

庫無餘財其廉所以能如此者以成都桑土子弟衣食自有餘饒爾治生者農工商賈而已士子多以務農為生商賈雖為逐末亦有可為者果處之不失義理或以姑濟一時亦無不可若以教學與作官規圖生計恐非古人之意也

歲時諸伴讀以酒禮至先生家先生辭曰所以奏取諸生者蓋為國家為吾道為學校為後進非為供備我也官守所當得者俸祿也俸祿之外復於諸生有取焉欲

師嚴道尊難矣

魯齋遺書卷十三